



KEMENTERIAN SUMBER MANUSIA

KENYATAAN MEDIA

BUKU AWARD TERPILIH MAHKAMAH PERUSAHAAN MALAYSIA DILANCARKAN DI PROGRAM INDUSTRIAL RELATIONS LECTURE SERIES 2025

Program *Industrial Relations Lecture Series* 2025 telah berlangsung pada 24 Julai 2025 (Khamis) dan bertempat di Hotel Royale Chulan Kuala Lumpur. Program ini merupakan inisiatif sulung yang dianjurkan oleh Mahkamah Perusahaan Malaysia (MPM). Penganjuran program ini bertujuan untuk menghimpunkan semua pihak berkepentingan dan pemegang taruh dalam ekosistem perhubungan perusahaan bagi memperkukuh perkongsian ilmu, amalan terbaik serta memperluas jaringan profesional.

Peserta-peserta yang telah dijemput menghadiri program ini terdiri daripada pegawai-pegawai MPM, wakil Kementerian dan Agensi serta Jabatan kerajaan, peguam, pihak majikan, kesatuan sekerja serta pelajar undang-undang dari pusat pengajian tinggi terpilih.

Objektif program ini ialah:

- a) menjadi platform untuk semua pihak berkepentingan dan pemegang taruh berkumpul serta berkongsi idea dalam mencari penyelesaian terbaik berkaitan isu perhubungan perusahaan;
- b) memperkukuh perkongsian ilmu dan amalan terbaik dalam penyelesaian pertikaian perusahaan dalam kalangan pengamal industri, ahli akademik serta

pihak berkepentingan yang berkaitan;

- c) meningkatkan sinergi antara MPM dengan agensi dan pemegang taruh;
- d) Menggalakkan lebih ramai penglibatan pengamal undang-undang muda dalam bidang Perhubungan Perusahaan;
- e) memberi inspirasi kepada pihak berkepentingan melalui pengalaman pengendalian kes oleh penceramah undangan.

Sesi ceramah ilmiah dikendalikan oleh dua (2) penceramah jemputan yang mempunyai pengalaman luas dalam bidang perundangan perhubungan perusahaan iaitu:

- a) Prof. Dr. Ashgar Ali bin Ali Mohamed, Pensyarah Undang-Undang, UIAM yang merupakan tokoh ilmunan dalam bidang undang-undang perburuhan dan undang-undang pekerjaan; dan
- b) YA Tuan Paramalingam a/l J. Doraisamy, Pengerusi MPM yang berpengalaman luas dalam perundangan perhubungan perusahaan.

Melalui siri ceramah ini, ruang wacana intelektual dan penyelesaian inovatif terhadap isu perburuhan dapat dibuka, malah turut mampu memupuk sinergi berkesan antara MPM dengan para pemegang taruh. Perkongsian ilmu mengenai pengalaman secara langsung daripada tokoh-tokoh penceramah yang berwibawa dapat memberi inspirasi serta membentuk pemikiran baharu dalam menangani pertikaian perusahaan secara adil, efisien dan beretika.

Antara intipati penting dalam program ini ialah **pelancaran Buku Award Terpilih Mahkamah Perusahaan Malaysia. Inisiatif penerbitan buku yang menghimpunkan 28 award terpilih yang telah dikeluarkan oleh barisan Pengerusi MPM bagi tempoh Januari 2023 hingga Januari 2025 ini merupakan satu usaha untuk menyediakan sumber rujukan yang berguna kepada para pengamal undang-undang, majikan, pekerja serta pihak berkepentingan.**

Buku ini turut menawarkan panduan praktikal dalam menangani isu-isu utama berkaitan perburuhan seperti pertikaian perusahaan, salah laku pekerjaan, prestasi kerja, pengurangan tenaga kerja, serta implikasi ketidakpatuhan terhadap award.

Penerbitan sulung setebal 524 muka surat ini merupakan usaha pertama dalam sejarah MPM dan dijangka memberi impak yang signifikan terhadap ekosistem penyelesaian pertikaian industri. Ia dihasilkan bagi membantu pihak-pihak berkepentingan memahami asas serta perkembangan dalam keputusan-keputusan yang telah dikeluarkan oleh MPM.

Secara strategik, penerbitan ini bertujuan untuk meningkatkan tahap ketelusan, konsistensi dan kebolehjangkaan keputusan Mahkamah; memudahkan penyebaran maklumat yang tepat; serta menyokong pembangunan dasar pekerjaan berasaskan data dan preseden undang-undang sebenar.

Buku ini akan dicetak secara berperingkat (100 naskhah fasa pertama) dan diedarkan kepada semua Pengerusi Mahkamah, institusi pengajian tinggi, pemain industri dan pemegang taruh utama yang lain termasuk agensi-agensi kerajaan yang berkaitan. Bagi memastikan buku ini mendapat capaian yang lebih luas, versi digital juga akan disediakan.

Usaha ini diharap menjadi titik tolak baharu dalam memartabat MPM sebagai institusi kehakiman perusahaan yang progresif dan responsif terhadap keperluan semasa, sekaligus menyumbang kepada peningkatan keadilan serta kesejahteraan pekerja dan majikan di Malaysia.

**KEMENTERIAN SUMBER MANUSIA
PUTRAJAYA
24 JULAI 2025**

LAMPIRAN**LATAR BELAKANG KESUMA**

Kementerian Sumber Manusia atau singkatannya KESUMA adalah kementerian yang bertanggungjawab kepada pembangunan kemahiran, pekerjaan, keselamatan dan kesihatan pekerjaan, kesatuan sekerja, perhubungan perusahaan, maklumat dan analisis pasaran buruh dan keselamatan sosial.

PERANAN & TANGGUNGJAWAB KESUMA

Membangunkan dan melahirkan modal insan yang kompeten, produktif, responsif dan berdaya tahan dalam pasaran buruh negara ke arah meningkatkan produktiviti negara. Memastikan kelancaran operasi pasaran buruh negara. Meningkatkan kebolehpekerjaan dan penggajian tenaga kerja tempatan bagi memenuhi keperluan pasaran kerja negara. Memastikan perhubungan perusahaan yang harmoni dan kondusif. Mengutamakan aspek keselamatan dan kesihatan pekerjaan. Memastikan jaringan keselamatan sosial yang komprehensif, dinamik dan progresif.

JABATAN DAN AGENSI DI BAWAH KESUMA

JABATAN	AGENSI
Jabatan Tenaga Manusia (JTM)	Pertubuhan Keselamatan Sosial (PERKESO)
Mahkamah Perusahaan Malaysia (MPM)	Institut Keselamatan Dan Kesihatan Pekerjaan Negara (NIOSH)
Jabatan Pembangunan Kemahiran (JPK)	Human Resources Development Corporation (HRDC)
Jabatan Keselamatan dan Kesihatan Pekerjaan (JKKP)	Talent Corporation Malaysia Berhad (TALENTCORP)
Jabatan Tenaga Kerja Semenanjung Malaysia (JTKSM)	Perbadanan Tabung Pembangunan Kemahiran (PTPK)
Jabatan Perhubungan Perusahaan Malaysia (JPPM)	
Jabatan Hal Ehwal Kesatuan Sekerja (JHEKS)	
Jabatan Tenaga Kerja Sabah	
Jabatan Tenaga Kerja Sarawak	